

翠簾館吟

卷三



翠藤館吟草卷三

香山芥樵羅蕙屏著

秋日登阜峯望岐海

江城滯涼雨萬瓦陰翠積海光抱城入片片曠秋碧石岐坦掌間
水繞衣帶窄風帆競出沒割裂天水白海氣溼彌重柳枝疎以瘠
孤邨入烟雨雨平疇偃稻麥行人小於粟纍纍貫阡陌登高俯塵壤
身去雲咫尺招手不得見中憾輒紅隔忽回江上風飛嵐杳無迹
漁唱答暮鍾夕照挂寒栢微暉林杪明新月吐蟾魄

月夜程蔚卿貳尹見過

矯矯君如鶴閑閑吾亦鷗茶烟兩人影月露一螢秋宦況春期夢

華年水退流得時且行道初志復何尤

不信泥雲隔吾生譏坐窮世情雙眼淡獨念百年空踴躍看長劍
升沈付短蓬偶然笑譚處蕭槭柳枝風

四更

秋光潤無著風露立中庭疎柳羣聚雀遠天飛一螢舒空雲漂白
耿壁火深青戍鼓城頭促四更人獨醒

燒衣曲

金風蕭蕭玉露微十字街頭燒鬼衣門前燭光紅萬枝鐃鼓瑯璁
雙耳疲紙灰著地寒不飛借風吹上黏蛛絲路旁老樹啼餓鴟啁
啾刺耳魂魄馳月黑鬼影來陸離頭足現滅蓬葆披新鬼含愁故

鬼飢瑟縮引頸前致詞秋高風冽寒刺肌捫腹往往愁餒而地下
况復無鳴機儘有刀尺供裁施感激收涕羣笑嘻嘻綃簇簇生光
輝撒地新果菱與梨或爲橐裏或手持吱啁滿路行委蛇冷風一
縷弗見之香煤烟漫霜氣滋斜月猶挂寒檐楣

秋夜

銀浦流雲露已珠淒淒風色怯孤蒲閑愁此夜月將落小院無人
燈自孤幾日病軀愁躑躑一絲涼夢入模糊薄衾睡起中庭立霜
氣滿天啼獨鳥

昨日

昨日風色寒病軀轉自適欣然試魚膾沽酒喜留客薄醉能雄談

神氣頗奕奕仰天玩悽景把卷坐遙夕檐馬鏘鐵聲銀蟾墮素魄
翛然屏衆慮無使纖埃積自信勿藥喜免貽慈母戚誰知陰雲散
旋見日光赤熱蒸挾雙眼火中鑽兩腋頭腦如簸風痛刺若觸石
把枯舐之苦掬管拈復擲天氣匪所定病魔亦扞格安得回金甌
愁病爲解釋

齋曉

秋堂曉陰薄游鵲響飛鈴默坐課書罷澹然風入庭天低蛛網碧
牆溼薜紋青心迸雲孤往長調動渺冥

秋日過清暉樓籍評留酌

高閣瞰魚塘遙山貢秋碧雲陰懸雨絲澹抹日將夕風皺水紋細

倒映入瑤席籬角花冷紅偏照波影白薄涼醉眼豁水天間咫尺
胸中蘊煩鬱半月哽塊石倏爾傾嘔出爽籟集肘腋微吟吁素空
片葉仰首擲含情屬今古蒼穹凍脈脉鑿地求片懽安能長跼蹐
區生貧者俠豪情略形迹古交勵窮賤斟酒酌圖籍倚欄橫笛聲
激越裂素帛孤鸞叫青冥瘦蛟舞荒澤滿耳急清商淒緊秋氣迫
髻齡讀書地感慨思疇昔塵網日深黜敗瓦蒼蘚積荏苒歷時序
回頭事遷易重覩悟夙分塞悲聊自適滄桑眼底濶底用深咨惜
鼎鼎百歲內懽娛駒走隙高訶且縱飲無然空騷感

東黃伴笙

我夢烟洲月君離珠海雲蒼茫雲月裏飛夢乍逢君別意新苔迹

長篇秋水文慰窮倘相過清笑酒微醺

秋日過問隱泉惺公病

數月聞公臥禪室行腳久未山門出老樵近亦憂采薪不叩柴關
六十日秋風過眼葉飛疾落黃癡繞維摩膝虛堂日暝生晦陰幾
點頑雲黑如漆羨公六慾早捐置奚恤鼠肝復蟲臂涼秋疎爽透
氣血四肢神行老魔避况公素持勿藥論日吸瓊漿擲甘餌心田
自種不死藥無任扁盧逞神異神光跏坐貫頂穴慈竹林中朶雲
庇覲面碧閃法眼光體膚皴瘦神采揚惟宜引肱復高臥香絲恬
繞清睡長

江城行

江城九月天欲霜乾風弄樹葉舞廊秋齋枯坐謝賓侶老桂瘦立
吹古香雲邊忽墮紙鳶影匝耳絃管聲琅琅春華豔媚幾何日轉
瞬斗宿紛更張飛鴉短柳日酸眼敗荷苦竹喧拂塘琴絃燥急厲
哀響篝火寒薄搖寸光一歲憂思此橫集暮林蕭槭揚清商含情
獨立宵未央素月亭亭窺女牆離顏照我微瘠黃瘦影瑟縮神惋
傷一聲叫雁纖雲碧露珠圓墜沾襟裳往事回頭時忖量暗結心
坎迴中腸去年秋老百憂併權發珠斛旋故鄉窮愁潦倒白日慘
大母垂危方臥牀已憾驪珠探復失旋驚鵬鳥來非祥米薪籌畫
計烟爨荅尤辛苦搜藥囊布衾夜淺交睫短青釭淚凍懸綆長苦
境歷歷尙眼底追憶猶令泣數行今歲秋風厭寒早蕭然貧病愁

相當餘恩三載付流水放歸樊素情未忘補天苦欲鍊色石種愁
深悔栽白楊案頭管禿繪事荒壺中醪濁豪興亡老莓階窄長淒
綠荆扉晝鎖深閉藏故交寒盟冷於水覲面羞澀頭藏昂慈親齒
脫髮半蒼幼稚恒忍飢無糧蟾宮花影遙相望目送秋隼飛翱翔
孤蟬抱枝啼烟涼中情悵悵吞聲將夜來騰躍心緒狂冷風入戶
蕩吟魄擲筆大呌羣鼠慌

寒夜

窗掩玻璃霜滿天默吟消受夜如年隔牆梅影盤枝曲映雪蛛絲
結網圓破硯尙堪呵凍筆敝裘惟賸煖詩肩蕭條門巷無人跡搖
曳青釭照不眠

夜脩儀庭書未發復題一絕

書成紙上墨花粗
計日開緘歲又徂
寥落故人渾不見
一樽寒雨夜燈孤

乍看一首與泮生

乍看新柳未吹絲
雲攪鴻濛水墨天
薜綠薄黏蝸篆滑
竹深微度鳥聲圓
二分春色愁如海
幾載閑情夢化烟
手折寒花風裏立
故人相望總茫然

睡起

寒多無穩夢無夢
底思眠落積連宵
雨鳥啼將曙天
繁光入窗小
鐘語隔花圓
起早驚春色
垂楊有挂烟

聞梁儀庭將自欖山來欣然有作悵然有憶

東風三月吹紅棉憶我去歲來欖山青江細浪盪柔櫓烟巒迎我
開笑顏君時作主吾作客春雨夜翦韭花碧談深窗火搖凍光坐
久部蛙破岑寂襟袂沾濃綠酒痕琅玕深畫新詩迹
時將園竹題句句留七
日未忍去此時握手累晨夕於今往事間一載雪泥無恙君健在
離悰遠挂楊柳枝日窮眼力爲君待君乎倘來飛櫓頻兩兩含意
常未伸藤蘿請拂石上月琥珀一醉花前春春風火急競催暮不
來花亦嗤笑人連朝陰濶曉寒重雲壓低簷黑如夢相思水遠未
得見昂頭天末雨絲凍

烟洲暮歸

四山純碧烟拖藍落紅簇簇風吹衫夕陽淡蕩未歸海半角銅鉦
林杪銜樹深土色凍逼面呵叱山鬼窮幽探百年老鴉立啄木幾
個野蛤跳入潭石險苔痕辨蒼黝潮高海氣迴腥鹹長松隔岸路
紆折指點白衿人兩三星光欲現碧酸眼錯落水底明鏡涵暮陰
離合磬響發漁笛遠畚栖霞庵我卻呼舟渡江去割取一股獅山
嵐水風花雲撲襟袂香沁鼻觀如酒酣柔櫓波搖月點碎疏篷光
曳燈火含回頭邨迴爨烟薄淒迷萬瓦魚鱗嵌路窮沙口倦腰腳
奚囊句滿肩儘擔舍舟復認石岐路微吟細語猶喃喃入門僮僕
一相笑風景飽看忘饑饉

苦雨

齋頭日日長聽雨十日真無一日停落賸花鬚漂淡白卷成苔髮
漚深青蝸貪溼土勤書字鶴媿飢容倦刷翎怨對凝雲非了事極
天如夢晝冥冥

梁逸亭先生屢介儀庭問訊於蕙并索近製未有以應暇作
長句報之

江城草碧春漸深墨雲聚墨成愁霖偏仄蝸室來言禽隱隱下聽
枯桐音欲彈調澀悽離心孤懷遠寄岡州岑此鄉詩老同素襟忘
年早契朋盍簪間唾珠玉披新吟書法兼擅王山陰不泥摹古腕
力沈偶一灑翰當代欽老叟溺學古籍淫日鑽青簡驅紅蟬令子
玉樹風中臨少騰香譽身泮林冠時早出驂騑豈屑屈蠖終蹄

潞想公掀髯懷幽忱兩鬢况喜霜未侵精神矍鑠德愈惜八年交
誼迄至今往來魚訊通江潯鴻篇下逮粉瑤琳虛懷每許同酌斟
賤子才具間難禁聞命汗落滋霍霍捫心自忖成焦琴羌無逸響
長默瘖縱然妄作迷南鍼公爲點鍊鎔渾金邇來春風眠薄衾淅
瀝苦雨檐端淋山川間濶情莫任幸此魂夢無商參異日穗石重
招尋尙聆緒論貽規箴

夜展永安江館圖

此地已新主此圖如故人悵然展燈下恍若親吾身人生富貴視
朝霞區區若此奚足云大厦朱門變衰草玉魚金虎空悲辛田園
一旦棄我去化爲墨汁爲烟雲萬貫腰纏暫能保子孫未必無憂

貧斯圖倘與金石壽千年尙作吾家珍朔吹凜凜百卉死只此光
景如長春半尺隙地達烟嶺數椽破屋臨江濱來游不用盪桂楫
亦不用臥希少文展圖好任自來去咫尺近勝東西隣黃金撒手
或沈海寸軸未許埋荒榛永藏什襲如拱璧任爾嗤者時搖脣

欖山菊會六十年一開聞今歲將舉欣然有作卻寄諸子

蟠桃會後菊花會百歲人能見幾回聞道會錢過十萬羣仙一笑
五雲開

看山早行

五鼓城頭月聞鷄早出城野含星火大樹壓嶺雲平露凍深花氣
風高蕩鶴聲隔溪人語雜已見賣茶旌

晚眺

含情且高望雲戀晚從容似隔江
天樹何來山寺鐘夕陽赭萬瓦
芳草碧孤峯爲爾風前立愁心疊幾重

戍鼓

戍鼓報殘夜林月輒東上淒然萬家夢
雲路靜摩盪對此青釭寒
冥漠涉幽想戶庭客去寂窗竹戛清響
爐烟篆微歇琴語韻彌朗
花醒搖弱枝送影弄虛幌捲簾達夜氣
輒風入飴蕩寒檐語飢雀
片光照蛛網

二十夜作

夜氣悄冥冥簾駒響不停
怒蛙吠殘月飢鳥逐流星
未曙柳眠地

無風花墮庭虛堂方客散鐙影爲誰青

暑夜默坐

繁星夜逾碧漢影淡虛堂時有好風至淨聞紅藕香遠天惟落月
殘檠尙孤光唧唧莎鷄響愁心爲爾長

漫興

晝長太覺渾無事睡起依然日影紅滿院槐花黃不落一蟬高唱
萬枝風

感事有作

夜火熒熒悄自青情鍾愧讀牡丹亭天高力補終餘缺夢短寒搖
易覺醒屢驗江萍驚聚散虛栽隄柳怨飄零祇今莫問東流水已